



An Bhruiséil, 14 Meitheamh 2022
(OR. en)

10139/22

**Comhad Idirinstitiúideach:
2021/0391(COD)**

**COPEN 237
JAI 872
EUROJUST 74
CODEC 897**

TORADH NA nIMEACHTAÍ

ó:	Ardrúnaíocht na Comhairle
chuig:	na toscaireachtaí
Uimh. an doic. roimhe seo:	9166/22
Uimh. an doic. ón gCoim.:	14684/21 + ADD 1
Ábhar:	Togra le haghaidh RIALACHÁN Ó PHARLAIMINT NA hEORPA AGUS ÓN gCOMHAIRLE lena mbunaítear ardán comhair chun tacú le feidhmiú na bhFoirne Comhpháirteacha um Imscrúdú agus lena leasaítear Rialachán (AE) 2018/1726. - Cur chuige ginearálta

Gheobhaidh na toscaireachtaí, san Iarscríbhinn a ghabhann leis seo, an togra le haghaidh Rialachán ó Pharlaimint na hEorpa agus ón gComhairle lena mbunaítear ardán comhair chun tacú le feidhmiú na bhFoirne Comhpháirteacha um Imscrúdú agus lena leasaítear Rialachán (AE) 2018/1726, ar tháinig an Chomhairle ar chur chuige ginearálta ina leith ag an 3878ú cruinniú a bhí aici an 9-10 Meitheamh 2022.

Togra le haghaidh

RIALACHÁN Ó PHARLAIMINT NA hEORPA AGUS ÓN gCOMHAIRLE

**lena mbunaítear ardán comhair chun tacú le feidhmiú na bhFoirne Comhpháirteacha um
Imscrúdú agus lena leasaítear Rialachán (AE) 2018/1726**

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 82(1),
pointe (d) de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag gníomhú dóibh i gcomhréir leis an ngnáthnós imeachta reachtach,

De bharr an mhéid seo a leanas:

- (1) Tá sé leagtha síos mar chuspóir ag an Aontas comhlimistéar saoirse, slándála agus ceartais a chur ar fáil dá shaoránaigh, gan teorainneacha inmheánacha, ina n-áiritheofar saorghluaiseacht daoine. Ag an am céanna, ní mór don Aontas a áirithiú go leanfaidh an comhlimistéar de bheith ina áit shábháilte. Ní féidir an cuspóir sin a bhaint amach ach trí úsáid a bhaint as bearta iomchuí chun an choireacht a chosc agus a chomhrac, lena n-áirítear an choireacht eagraithe agus an sceimhlitheoireacht.

- (2) Tá sé sin thar a bheith dúshlánach i gcás ina mbíonn gné thrasteorann ag baint leis an gcoireacht ar chríoch roinnt Ballstát agus/nó tríú tíortha. Sna cásanna sin, ní mór do na Ballstáit a bheith in ann dul i gcomhar lena bhfórsaí agus lena n-oibríochtaí chun imscrúduithe agus ionchúisimh trasteorann éifeachtacha agus éifeachtúla a cheadú a bhfuil malartú faisnéise agus fianaise ríthábhachtach ina leith. Ceann de na huirlisí is rathúla don chomhar trasteorann sin is ea na Foirne Comhpháirteacha um Imscrúdú ('JITanna') trínar féidir comhar díreach agus cumarsáid dhíreach a dhéanamh idir na húdaráis bhreithiúnacha agus na húdaráis forfheidhmithe dlí i roinnt Ballstát agus b'fhéidir i dtríú tíortha, chun a gcuid gníomhaíochtaí agus imscrúduithe a eagrú ar an mbealach is éifeachtúla is féidir. Déanann údaráis inniúla dhá Bhallstát nó níos mó agus b'fhéidir údaráis inniúla tríú tíortha Foirne Comhpháirteacha um Imscrúdú a bhunú le haghaidh cuspóir sonrach agus tréimhse ama theoranta chun imscrúduithe coiriúla a bhfuil tionchar trasteorann acu a dhéanamh go comhpháirteach.
- (3) Déanann *acquis* an Aontais foráil maidir le dhá chreat dhlíthiúla chun Foirne Comhpháirteacha um Imscrúdú a bhunú a mbeidh dhá Bhallstát ar a laghad rannpháirteach iontu: Cinneadh Réime 2002/465/CGB ón gComhairle¹ agus Airteagal 13 den Choinbhinsiún um Chúnamh Frithpháirteach in Ábhair Choiriúla idir Ballstáit an Aontais Eorpaigh, arna bhunú ag an gComhairle i gcomhréir le hAirteagal 34 den Chonradh ar an Aontas Eorpach². Féadfaidh tríú tíortha a bheith rannpháirteach mar pháirtithe i bhFoirne Comhpháirteacha um Imscrúdú i gcás ina bhfuil bunús dlí leis an rannpháirtíocht sin, amhail Airteagal 20 den Dara Prótacal Breise a ghabhann le Coinbhinsiún Chomhairle na hEorpa 1959³ agus Airteagal 5 den Chomhaontú maidir le Cúnamh Dlíthiúil Frithpháirteach idir an tAontas Eorpach agus Stáit Aontaithe Mheiriceá⁴.

¹ Cinneadh Réime 2002/465/CGB ón gComhairle an 13 Meitheamh 2002 maidir le foirne comhpháirteacha imscrúdúcháin (IO L 162, 20.6.2002, lch. 1).

² IO C 197, 12.7.2000, lch. 3.

³ CET Uimh. 182.

⁴ IO L 181, 19.7.2003, lch. 34.

- (4) Sna creataí dlíthiúla atá ann cheana ar leibhéal an Aontais, ní leagtar amach conas a dhéanann na heintitis atá rannpháirteach i bhFoirne Comhpháirteacha um Imscrúdú faisnéis a mhalartú agus cumarsáid a dhéanamh. Tagann na heintitis sin ar chomhaontú maidir le malartú agus cumarsáid den sórt sin ar bhonn na riachtanas agus na modhanna atá ar fáil. Mar sin féin, níl bealach tiomnaithe slán agus éifeachtach ann a bhféadfadh na rannpháirtithe uile leas a bhaint as agus trína bhféadfaidís méideanna móra faisnéise agus fianaise a mhalartú go pras nó cumarsáid shlán agus éifeachtach a cheadú. Ina theannta sin, níl aon chóras ann a thacódh le bainistiú laethúil Foirne Comhpháirteacha um Imscrúdú, lena n-áirítear inrianaitheacht na fianaise a mhalartaítear i measc na rannpháirtithe.
- (5) I bhfianaise an mhéadaithe atá tagtha ar an bhféidearthacht go bhfaighidh coirpigh rochtain ar chórais Teicneolaíochta Faisnéise (TF), d'fhéadfadh an staid reatha bac a chur ar éifeachtacht agus ar éifeachtúlacht imscrúduithe trasteorann agus na himscrúduithe agus ionchúisimh sin a chur i mbaol agus a mhoilliú, rud a d'fhágfadh go mbeadh siad níos costasaí. Ní mór do na breithiúna agus do na húdaráis forghníomhaithe dlí, go háirithe, a áirithiú go mbeidh a gcórais chomh sábháilte agus is féidir agus gur féidir le comhaltaí uile na bhFoirne Comhpháirteacha um Imscrúdú nascadh agus idirghníomhú go héasca, go neamhspleách ar a gcórais náisiúnta.
- (6) D'fhéadfaí luas agus éifeachtúlacht na malartuithe idir na heintitis atá rannpháirteach i bhFoirne Comhpháirteacha um Imscrúdú a fheabhsú go mór trí ardán tiomnaithe TF a chruthú chun tacú lena bhfeidhmiú. Dá bhrí sin, is gá rialacha a leagan síos lena mbunófar ardán láraithe TF ('ardán comhair Foirne Comhpháirteacha um Imscrúdú') ar leibhéal an Aontais chun cabhrú le Foirne Comhpháirteacha um Imscrúdú comhoibriú, cumarsáid shlán a dhéanamh agus faisnéis agus fianaise a roinnt.

- (7) Níor cheart ardán comhair na bhFoirne Chomhpháirteacha um Imscrúdú a úsáid ach amháin i gcás ina bhfuil ceann amháin de bhunúis dlí an Aontais, i measc bunúis dlí, ina bhunús dlí don Fhoireann Chomhpháirteach um Imscrúdú. Maidir le gach Foireann Chomhpháirteach um Imscrúdú atá bunaithe go huile agus go hiomlán ar bhunúis dlí idirnáisiúnta, níor cheart an t-ardán, a maoiníodh le buiséad an Aontais agus a forbraíodh ar bhonn reachtaíocht an Aontais, a úsáid. Mar sin féin, i gcás ina bhfuil tríú tír mar chuid de chomhaontú maidir le Foireann Chomhpháirteach um Imscrúdú ina liostaítear ceann amháin de bhunúis dlí an Aontais seachas ceann idirnáisiúnta, ba cheart a húdaráis inniúla a mheas mar chomhaltaí d'Fhoireann Chomhpháirteach um Imscrúdú.
- (8) Ba cheart úsáid ardán comhair na bhFoirne Chomhpháirteacha um Imscrúdú a bheith ar bhonn deonach. Mar sin féin, i bhfianaise an bhreisluacha a bhaineann leis ó thaobh imscrúduithe trasteorann de, moltar go láidir é a úsáid. Níor cheart go ndéanfaidh úsáid nó neamhúsáid ardán comhair na bhFoirne Chomhpháirteacha um Imscrúdú dochar ná difear do dhlíthiúlacht cineálacha eile cumarsáide nó malartaithe faisnéise agus níor cheart go n-athródh sé sin an chaoi a ndéantar na Foirne Chomhpháirteacha um Imscrúdú a bhunú, a eagrú nó a fheidhmiú. Níor cheart go mbeadh tionchar ag bunú ardán comhair na bhFoirne Chomhpháirteacha um Imscrúdú ar bhunúis dlí bhunúsacha na bhFoirne Chomhpháirteacha um Imscrúdú ná ar an reachtaíocht náisiúnta nós imeachta is infheidhme maidir le bailiú agus úsáid na fianaise a fhaightear. Níor cheart don ardán uirlis shlán TF a sholáthar ach amháin chun feabhas a chur ar chomhar agus ar éifeachtacht na bhFoirne Chomhpháirteacha um Imscrúdú.
- (9) Ba cheart go gclúdódh ardán comhair na bhFoirne Chomhpháirteacha um Imscrúdú na céimeanna oibríochtúla agus iar-oibríochtúla d'Fhoireann Chomhpháirteach um Imscrúdú, ón nóiméad a shíneoidh a chomhaltaí an comhaontú ábhartha maidir le Foireann Chomhpháirteach um Imscrúdú, go dtí go ndéanfar an mheastóireacht ar an bhFoireann Chomhpháirteach um Imscrúdú a thabhairt chun críche. Ós rud é nach ionann na gníomhaithe atá rannpháirteach i bpróiseas bunaithe na Foirne Comhpháirtí um Imscrúdú agus na gníomhaithe atá ina gcomhaltaí den Fhoireann Chomhpháirteach um Imscrúdú nuair a bheidh sé bunaithe, níor cheart go ndéanfaidh ardán comhair na bhFoirne Chomhpháirteacha um Imscrúdú bainistiú ar an bpróiseas chun an comhaontú maidir le Foireann Chomhpháirteach um Imscrúdú a bhunú, go háirithe maidir le caibidlíocht a dhéanamh ar an ábhar agus an comhaontú maidir le Foireann Chomhpháirteacha um Imscrúdú a shíniú. Mar sin féin, nuair a bheidh gá le huirilis leictreonach chun tacú leis an bpróiseas chun Foireann Chomhpháirteach um Imscrúdú a chlárú, ba cheart don Choimisiún féachaint an bhféadfaí an próiseas sin a chumhdach leis an gCóras r-Fhianaise um Malartú Digiteach (eEDES).

- (10) Maidir le gach Foireann Chomhpháirteach um Imscrúdú a bhaineann úsáid as ardán comhair na bhFoirne Comhpháirteacha um Imscrúdú, ba cheart baill na Foirne Comhpháirtí um Imscrúdú a spreagadh chun meastóireacht a dhéanamh ar an bhFoireann Chomhpháirteach um Imscrúdú, le linn chéim oibríochtúil na Foirne Comhpháirtí um Imscrúdú nó i ndiaidh clabhsúr a chur léi, trí úsáid a bhaint as na huirlisí atá curtha ar fáil ag ardán comhair na bhFoirne Comhpháirteacha um Imscrúdú.
- (11) Ba cheart an comhaontú maidir le Foireann Chomhpháirteach um Imscrúdú, a bhféadfar foscúbhinní a chur leis freisin, a bheith ina réamhriachtanas chun ardán comhair na bhFoirne Comhpháirteacha um Imscrúdú a úsáid. Ba cheart inneachar gach comhaontaithe maidir le Foireann Chomhpháirteach um Imscrúdú a bheidh ann amach anseo a oiriúnú chun forálacha ábhartha an Rialacháin seo a chur san áireamh.
- (11a) D'fhorbair Líonra JITanna samhail-chomhaontú⁵ lena n-áirítear foscúbhinní, chun bunú JITanna a éascú.⁶ Ba cheart ábhar an tsamhail-chomhaontaithe agus na foscúbhinní a oiriúnú chun an cinneadh leas a bhaint as ardán comhair na JITanna agus na rialacha maidir le rochtain ar an ardán a chur san áireamh.
- (12) Ó thaobh na hoibríochta de, ba cheart ardán comhair na bhFoirne Comhpháirteacha um Imscrúdú a bheith comhdhéanta de spásanna comhair leithlisithe a chruthaítear le haghaidh na bhFoirne Comhpháirteacha um Imscrúdú aonair ar fad atá á n-óstáil ag an ardán.
- (13) Ó thaobh na teicneolaíochta de, ba cheart rochtain a bheith ar ardán comhair na bhFoirne Comhpháirteacha um Imscrúdú trí nasc slán ar an idirlíon agus ba cheart an t-ardán a bheith comhdhéanta de chóras faisnéise láraithe a mbeadh rochtain air trí thairseach gréasáin, bogearraí cumarsáide le haghaidh gléasanna móibíleacha agus deisce, agus nasc idir an córas faisnéise láraithe agus uirlisí TF ábhartha, lena dtacaítear le feidhmiú na bhFoirne Comhpháirteacha um Imscrúdú agus á bhainistiú ag Rúnaíocht Líonra na bhFoirne Comhpháirteacha um Imscrúdú.

⁵ IO C 18, 19.1.2017, lch. 1

⁶ IO C 44, 28.1.2022, lch. 2

- (14) Ba cheart é a bheith mar chuspóir ag ardán comhair na bhFoirne Comhpháirteacha um Imscrúdú comhordú agus bainistiú laethúil Foirne Comhpháirteacha um Imscrúdú a éascú, malartú agus stóráil shealadach faisnéise agus fianaise oibríochtúil a áirithiú, cumarsáid shlán a chur ar fáil, foráil a dhéanamh maidir le hinrianaitheacht fianaise agus tacú leis an bpróiseas chun meastóireacht a dhéanamh ar Fhoireann Chomhpháirteach um Imscrúdú. Ba cheart gach eintiteas atá rannpháirteach i bhFoirne Comhpháirteacha um Imscrúdú a spreagadh chun leas a bhaint as feidhmiúlachtaí uile ardán comhair na bhFoirne Comhpháirteacha um Imscrúdú agus chun bealaí nua cumarsáide agus malartaithe sonraí a chur in ionad na mbealaí cumarsáide agus malartaithe sonraí atá in úsáid faoi láthair a mhéid is féidir.
- (15) Comhlánaíonn ardán comhair na bhFoirne Comhpháirteacha um Imscrúdú na huirlisí atá ann cheana lenar féidir sonraí a mhalartú ar bhealach slán idir údaráis bhreithiúnacha agus forfheidhmithe dlí, amhail an Feidhmchlár Líonra um Malartú Slán Faisnéise (SIENA).
- (16) Ba cheart feidhmiúlachtaí cumarsáide ardán comhair na bhFoirne Comhpháirteacha um Imscrúdú a chur ar fáil le bogearraí lenar féidir cumarsáid neamh-inrianaithe a stóráiltear go háitiúil ar fheistí na n-úsáideoirí a dhéanamh.
- (17) Ba cheart feidhmiúlacht cheart lena féidir faisnéis agus fianaise oibríochtúil a mhalartú, lena n-áirítear comhaid mhóra, a áirithiú trí shásra uaslódála/íoslódála atá ceaptha chun na sonraí a stóráil go lárnach ar feadh na tréimhse teoranta ama is gá chun na sonraí a aistriú ar bhealach teicniúil agus ar feadh na tréimhse sin amháin. A luaithe a íoslódálann gach seoladh na sonraí, ba cheart iad a scriosadh go huathoibríoch ó ardán comhair na bhFoirne Comhpháirteacha um Imscrúdú.

- (18) I bhfianaise na taithí atá aici ar chórais mhórsála a bhainistiú i réimse an cheartais agus gnóthaí baile, ba cheart é a chur de chúram ar Gníomhaireacht an Aontais Eorpaigh chun Bainistiú Oibríochtúil a dhéanamh ar Chórais Mhórsála TF sa Limistéar Saoirse, Slándála agus Ceartais (eu-LISA) a bunaíodh le Rialachán (AE) 2018/1726 ó Pharlaimint na hEorpa agus ón gComhairle⁷ ardán comhair na bhFoirne Comhpháirteacha um Imscrúdú a cheapadh, a fhorbairt agus a oibriú trí úsáid a bhaint as feidhmiúlachtaí SIENA atá ann cheana agus feidhmiúlachtaí eile Europol chun comhlántacht agus, i gcás inarb iomchuí, idir-inoibritheacht a áirithiú. Dá bhrí sin, ba cheart sainordú na Gníomhaireachta a leasú chun na cúraimí nua sin a léiriú agus ba cheart an cistiú agus an fhoireann iomchuí a sholáthar di chun a cuid freagrachtaí faoin Rialachán seo a chomhlíonadh. Maidir leis sin, ba cheart rialacha a bhunú maidir leis na freagrachtaí a bheidh ar eu-LISA, agus í ag feidhmiú mar an Gníomhaireacht ar a gcuirtear de chúram ardán comhair na bhFoirne Comhpháirteacha um Imscrúdú a fhorbairt, a oibriú go teicniúil agus a chothabháil.
- (19) Agus ardán comhair na JITanna á cheapadh aige, ba cheart do eu-LISA a áirithiú go bhféadfaí, i gcás inar gá, sonraí atá ag údaráis forfheidhmithe dlí a tharchur go héasca ó SIENA chuig ardán comhair na JITanna.

⁷ Rialachán (AE) 2018/1726 ó Pharlaimint na hEorpa agus ón gComhairle an 14 Samhain 2018 maidir le Gníomhaireacht an Aontais Eorpaigh chun Bainistiú Oibríochtúil a dhéanamh ar Chórais Mhórsála TF sa Limistéar Saoirse, Slándála agus Ceartais (eu-LISA), agus lena leasaítear Rialachán (CE) Uimh. 1987/2006 agus Cinneadh 2007/533/CGB ón gComhairle agus lena n-aisghairtear Rialachán (AE) Uimh. 1077/2011 (IO L 295, 21.11.2018, lch. 99).

- (20) Ó bunaíodh Líonra na Saineolaithe Náisiúnta ar Fhoirne Comhpháirteacha um Imscrúdú i gcomhréir le Doiciméad 11037/05 ón gComhairle⁸, tacaíonn Rúnaíocht Líonra na bhFoirne Comhpháirteacha um Imscrúdú le hobair Líonra na bhFoirne Comhpháirteacha um Imscrúdú trí chruinnithe bliantúla agus oiliúint a eagrú, tuarascálacha meastóireachta ar an bhFoireann Chomhpháirteach um Imscrúdú a bhailiú agus anailís a dhéanamh orthu agus clár maoinithe Eurojust maidir le Foireann Chomhpháirteach um Imscrúdú a bhainistiú. Ó 2011 i leith, tá Rúnaíocht Líonra na bhFoirne Comhpháirteacha um Imscrúdú á hóstáil ag Eurojust mar aonad ar leith. Chun go gcuirfí ar chumas Líonra Rúnaíocht na bhFoirne Comhpháirteacha um Imscrúdú tacaíocht a thabhairt d'úsáideoirí i gcur i bhfeidhm praiticiúil ardán comhair na bhFoirne Comhpháirteacha um Imscrúdú, chomh maith le tacaíocht theicniúil agus tacaíocht riaracháin a thabhairt do riarthóirí spáis na Foirne Comhpháirtí um Imscrúdú, ba cheart an fhoireann iomchuí a chur ar fáil do Eurojust lena leithdháileadh ar Rúnaíocht Líonra na bhFoirne Comhpháirteacha um Imscrúdú.
- (21) I bhfianaise na n-uirlisí TF atá ann faoi láthair lena dtacaítear le hoibríochtaí na bhFoirne Comhpháirteacha um Imscrúdú, atá á n-óstáil ag Eurojust agus á mbainistiú ag Rúnaíocht Líonra na bhFoirne Comhpháirteacha um Imscrúdú, is gá ardán comhair na bhFoirne Comhpháirteacha um Imscrúdú a nascadh leis na huirlisí TF sin, chun bainistiú na bhFoirne Comhpháirteacha um Imscrúdú a éascú. Chuige sin, ba cheart do Eurojust a áirithiú go ndéanfar an t-oiriúnú teicniúil is gá ar a chórais chun nasc den sórt sin a bhunú. Ba cheart an cistiú agus an fhoireann iomchuí a chur ar fáil do Eurojust chun a fhreagrachtaí a chomhlíonadh ina leith sin.
- (22) Chun leithdháileadh soiléir ceart agus cúraimí a áirithiú, ba cheart rialacha a bhunú maidir le freagrachtaí na mBallstát, Eurojust, Europol, Oifig an Ionchúisitheora Phoiblí Eorpaigh, na hOifige Eorpaí Frith-Chalaoise (OLAF) agus comhlachtaí, oifigí agus gníomhaireachtaí inniúla eile de chuid an Aontais, lena n-áirítear na coinníollacha faoinar féidir leo úsáid a bhaint as ardán comhair na bhFoirne Comhpháirteacha um Imscrúdú chun críoch oibriúcháin.

⁸ Comhairle an Aontais Eorpaigh, Toradh Imeachtaí an Choiste Comhordúcháin i réimse an chomhair póilíneachta agus bhreithiúnaigh in ábhair choiriúla an 7 agus an 8 Iúil 2005, Mír 7 ar an gClár Oibre: Foirne Comhpháirteacha um Imscrúdú – Togra le haghaidh saineolaithe náisiúnta a ainmniú, 11037/05.

- (23) Leagtar amach sa Rialachán seo na mionsonraí faoi shainordú, comhdhéanamh agus gnéithe eagrúcháin Bhord Bainistíochta an Chláir ar cheart do Bhord Bainistíochta eu-LISA a chur ar bun. Ba cheart do Bhord Bainistíochta an Chláir a áirithiú go ndéanfar bainistiú leordhóthanach ar chéim deartha agus forbartha ardán comhair na bhFoirne Comhpháirteacha um Imscrúdú. Is gá freisin sonraí faoi shainordú, comhdhéanamh agus gnéithe eagrúcháin an Ghrúpa Chomhairligh a bhunóidh eu-LISA a leagan amach chun saineolas a fháil a bhaineann le hardán comhair na bhFoirne Comhpháirteacha um Imscrúdú, go háirithe i gcomhthéacs a chlár oibre bliantúil agus a thuarascáil bhliantúil ar ghníomhaíochtaí a ullmhú.
- (24) Bunaítear leis an Rialachán seo rialacha maidir le rochtain ar ardán comhair na bhFoirne Comhpháirteacha um Imscrúdú agus na coimircí is gá. Ba cheart é a bheith de chúram ar riarthóir spáis nó riarthóirí spáis na Foirne Comhpháirtí um Imscrúdú na cearta rochtana ar spásanna comhair aonair na Foirne Comhpháirtí um Imscrúdú a bhainistiú. Ba cheart iad a bheith i gceannas ar rochtain a bhainistiú, le linn chéimeanna oibríochtúla agus iar-oibríochtúla na Foirne Comhpháirtí um Imscrúdú, d'úsáideoirí ardán comhair na bhFoirne Comhpháirteacha um Imscrúdú, ar bhonn Chomhaontú JIT. Ba cheart do riarthóirí spáis JIT a bheith in ann a gcúraimí teicniúla agus riaracháin a aistriú chuig Rúnaíocht Líonra na JITanna, ach amháin i gcás fhíorú na sonraí arna n-uaslódáil ag tríú tíortha.
- (25) Agus aird á tabhairt ar a íogaire atá na sonraí oibríochtúla a mhalartaítear i measc úsáideoirí ardán comhair na bhFoirne Comhpháirteacha um Imscrúdú, ba cheart d'ardán comhair na bhFoirne Comhpháirteacha um Imscrúdú leibhéal ard slándála a ráthú. Ba cheart do eu-LISA gach beart teicniúil agus eagraíochtúil is gá a dhéanamh chun slándáil an mhalartaithe sonraí a áirithiú trí algartaim chriptiúcháin láidre ó cheann go ceann a úsáid chun sonraí faoi bhealach nó ar fos a chriptiú.

- (26) Leis an Rialachán seo, bunaítear rialacha maidir le dliteanas Ballstát, eu-LISA, Eurojust, Europol, Oifig an Ionchúisitheora Phoiblí Eorpaigh, OLAF agus comhlachtaí, oifigí agus gníomhaireachtaí inniúla eile de chuid an Aontais i ndáil le damáiste ábhartha nó neamhábhhartha a tharlaíonn mar thoradh ar aon ghníomh nach bhfuil ag luí leis an Rialachán seo. Maidir le tríú tíortha, ba cheart clásail dliteanais i leith damáiste ábhartha nó neamhábhhartha a bheith sna comhaontuithe lena mbaineann maidir le Foireann Chomhpháirteach um Imscrúdú.
- (27) Ina theannta sin, déantar foráil sa Rialachán seo maidir le forálacha cosanta sonraí ar leith maidir le sonraí oibríochtúla agus sonraí neamhoibríochtúla araon, ar forálacha iad a bhfuil gá leo chun na socruithe atá ann cheana maidir le cosaint sonraí a fhorlíonadh agus chun foráil a dhéanamh maidir le leibhéal foriomlán leordhóthanach cosanta sonraí, slándáil sonraí agus cosaint chearta bunúsacha na ndaoine lena mbaineann.
- (28) Tá feidhm ag Treoir (AE) 2016/680 ó Pharlaimint na hEorpa agus ón gComhairle⁹ maidir le próiseáil sonraí pearsanta a dhéanann na húdaráis inniúla náisiúnta chun cionta coiriúla a chosc, a imscrúdú, a bhrath nó a ionchúiseamh nó chun pionóis choiriúla a fhorghníomhú, lena n-áirítear coimirceí a dhéanamh in aghaidh bagairtí ar an tslándáil phoiblí agus cosc a chur ar na bagairtí sin. Maidir leis an bpróiseáil a dhéanann institiúidí, comhlachtaí, oifigí agus gníomhaireachtaí an Aontais, ba cheart feidhm a bheith ag Rialachán (AE) 2018/1725 ó Pharlaimint na hEorpa agus ón gComhairle¹⁰ i gcomhthéacs an Rialacháin seo.

⁹ Treoir (AE) 2016/680 ó Pharlaimint na hEorpa agus ón gComhairle an 27 Aibreán 2016 maidir le cosaint daoine nádúrtha i ndáil le próiseáil sonraí pearsanta ag údaráis inniúla chun cionta coiriúla a chosc, a imscrúdú, a bhrath nó a ionchúiseamh nó chun pionóis choiriúla a fhorghníomhú, agus maidir le saorghluaiseacht sonraí den sórt sin agus lena n-aisghairtear Cinneadh Réime 2008/977/CGB ón gComhairle (IO L 119, 4.5.2016, lch. 89)

¹⁰ Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil le sonraí pearsanta a phróiseáil ag institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, lch. 39).

- (28a) Ba cheart do gach údarás inniúil náisiúnta i mBallstát, agus i gcás inarb iomchuí, Eurojust, Europol, Oifig an Ionchúisitheora Phoiblí Eorpaigh, OLAF nó aon chomhlacht, oifig nó gníomhaireacht inniúil eile de chuid an Aontais a bheith freagrach ar bhonn aonair as próiseáil na sonraí pearsanta oibríochtúla a íoslódálann gach ceann acu chuig ardán comhair na JITanna, agus as aon phróiseáil sonraí pearsanta oibríochtúla a íoslódálann gach ceann acu ó ardán comhair na JITanna.
- (29) I gcomhréir le comhaontú JIT, ba cheart go bhféadfadh riarthóirí spáis na Foirne Comhpháirtí um Imscrúdú rochtain ar spás comhair a dheonú do thríú tíortha ar pháirtithe iad i gcomhaontú maidir le Foireann Chomhpháirteach um Imscrúdú; Aon aistriú sonraí pearsanta a dhéantar chuig tríú tíortha nó chuig eagraíochtaí idirnáisiúnta i gcomhthéacs comhaontaithe maidir le Foireann Chomhpháirteach um Imscrúdú, tá sé faoi réir chomhlíonadh na bhforálacha a leagtar amach i gCaibidil V de Threoir (AE) 2016/680. Ba cheart malartuithe sonraí oibríochtúla le tríú tíortha a bheith teoranta do na malartuithe a bhfuil gá leo chun cuspóirí an chomhaontaithe maidir le Foireann Chomhpháirteach um Imscrúdú a chomhlíonadh.
- (30) I gcás ina bhfuil roinnt riarthóirí spáis ag Foireann Chomhpháirteach um Imscrúdú, ba cheart do na riarthóirí spáis sin comhaontú a dhéanamh eatarthu féin, a luaite a bhunófar spás comhair na Foirne Comhpháirtí um Imscrúdú, lena n-áirítear tríú tíortha, faoi cheann amháin acu a bheith ina rialaitheoir ar na sonraí a uaslódálann na tríú tíortha sin.
- (31) Ba cheart do eu-LISA a áirithiú go ndéanfar rochtain ar an gcóras faisnéise láraithe agus ar gach oibríocht próiseála sonraí sa chóras faisnéise láraithe a logáil chun faireachán a dhéanamh ar shláine agus slándáil sonraí, ar dhlíthiúlacht na próiseála sonraí agus chun críoch féinfhaireacháin chomh maith.
- (32) Leis an Rialachán seo, forchuirtear oibleagáidí tuairiscithe ar eu-LISA maidir le forbairt agus feidhmiú ardán comhair na bhFoirne Comhpháirteacha um Imscrúdú i bhfianaise na gcuspóirí a bhaineann le pleanáil, aschur teicniúil, éifeachtúlacht costais, slándáil agus cáilíocht seirbhíse. Ina theannta sin, ba cheart don Choimisiún meastóireacht fhoriomlán a dhéanamh ar ardán comhair na bhFoirne Comhpháirteacha um Imscrúdú ceithre bliana tar éis tús a bheith curtha le hoibríochtaí ardán comhair na bhFoirne Comhpháirteacha um Imscrúdú agus gach ceithre bliana ina dhiaidh sin.

- (33) Maidir le gach Ballstáit chomh maith le Eurojust, Europol, Oifig an Ionchúisitheora Phoiblí Eorpaigh, OLAF agus aon chomhlacht, oifig agus gníomhaireacht inniúil eile de chuid an Aontais, is orthu féin a bheidh sé na costais a thiocfaidh as úsáid a bhaint as ardán comhair na bhFoirne Comhpháirteacha um Imscrúdú.
- (34) Chun coinníollacha a bhunú maidir le forbairt theicniúil agus cur chun feidhme ardán comhair na bhFoirne Comhpháirteacha um Imscrúdú, ba cheart cumhachtaí cur chun feidhme a thabhairt don Choimisiún. Ba cheart na cumhachtaí sin a fheidhmiú i gcomhréir le Rialachán (AE) Uimh. 182/2011 ó Pharlaimint na hEorpa agus ón gComhairle¹¹.
- (35) Ba cheart don Choimisiún an dáta a chuirfear tús le hoibríochtaí ardán comhair na bhFoirne Comhpháirteacha um Imscrúdú a chinneadh a luaithe a ghlacfar na gníomhartha cur chun feidhme ábhartha is gá chun ardán comhair na bhFoirne Comhpháirteacha um Imscrúdú a fhorbairt go teicniúil agus a luaithe a bheidh tástáil chuimsitheach déanta ag eu-LISA ar ardán comhair na bhFoirne Comhpháirteacha um Imscrúdú, i gcomhar leis na Ballstáit.
- (36) Ós rud é nach féidir leis na Ballstáit cuspóir an Rialacháin seo, eadhon comhar, cumarsáid agus malartú faisnéise agus fianaise atá éifeachtach agus éifeachtúil a éascú idir comhaltaí na Foirne Comhpháirtí um Imscrúdú, Eurojust, Europol, OLAF agus comhlachtaí, oifigí agus gníomhaireachtaí inniúla eile de chuid an Aontais, a ghnóthú go leordhóthanach, ach gur fearr is féidir iad a ghnóthú ar leibhéal an Aontais trí rialacha comhchoiteanna a leagan amach, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach (CAE). I gcomhréir le prionsabal na comhréireachta mar a leagtar amach san Airteagal sin, ní théann an Rialachán seo thar a bhfuil riachtanach chun an cuspóir sin a ghnóthú.

¹¹ Rialachán (AE) Uimh. 182/2011 ó Pharlaimint na hEorpa agus ón gComhairle an 16 Feabhra 2011 lena leagtar síos na rialacha agus na prionsabail ghinearálta a bhaineann leis na sásraí maidir le rialú ag na Ballstáit ar fheidhmiú cumhachtaí cur chun feidhme ag an gCoimisiún (IO L 55, 28.2.2011, lch. 13).

- (37) I gcomhréir le hAirteagail 1 agus 2 de Phrótacal Uimh. 22 maidir le seasamh na Danmhairge, atá i gceangal leis an gConradh ar an Aontas Eorpach agus leis an gConradh ar Fheidhmiú an Aontais Eorpaigh, níl an Danmhairg rannpháirteach i nglacadh an Rialacháin seo agus níl sí faoi cheangal aige ná faoi réir a chur i bhfeidhm.
- (38) I gcomhréir le hAirteagal 3 de Phrótacal Uimh. 21 maidir le seasamh na Ríochta Aontaithe agus na hÉireann i dtaca leis an limistéar saoirse, slándála agus ceartais, atá i gceangal leis an gConradh ar an Aontas Eorpach agus leis an gConradh ar Fheidhmiú an Aontais Eorpaigh, tá fógra tugtha ag Éirinn, le litir an 07 Aibreán 2022, gur mian léi a bheith rannpháirteach i nglacadh agus i gcur i bhfeidhm an Rialacháin seo.
- (39) Chuathas i gcomhairle leis an Maoirseoir Eorpach ar Chosaint Sonraí i gcomhréir le hAirteagal 42(1) de Rialachán (AE) Uimh 2018/1725 agus thug sé a thuairim uaidh an 25 Eanáir 2022.

TAR ÉIS AN RIALACHÁN SEO A GHLACADH:

CAIBIDIL I

Forálacha ginearálta

Airteagal 1

Ábhar

Leis an Rialachán seo:

- a. bunaítear ardán TF (‘ardán comhair na bhFoirne Comhpháirteacha um Imscrúdú’) a bheidh le húsáid ar bhonn deonach, chun comhar na n-údarás inniúil atá rannpháirteach i bhFoirne Comhpháirteacha um Imscrúdú arna bhunú ar bhonn Airteagal 13 den Choinbhinsiún um Chúnamh Frithpháirteach in Ábhair Choiriúla idir Ballstáit an Aontais Eorpaigh, arna bhunú ag an gComhairle i gcomhréir le hAirteagal 34 den Chonradh ar an Aontas Eorpach nó Cinneadh Réime 2002/465/CGB a éascú;
- b. leagtar síos rialacha maidir le freagrachtaí a roinnt idir úsáideoirí ardán comhair na bhFoirne Comhpháirteacha um Imscrúdú agus an ghníomhaireacht atá freagrach as ardán comhair na bhFoirne Comhpháirteacha um Imscrúdú a fhorbairt agus a chothabháil;
- c. leagtar amach na coinníollacha faoina bhféadfadh rochtain a thabhairt d’úsáideoirí ardán comhair na bhFoirne Comhpháirteacha um Imscrúdú ar ardán comhair na bhFoirne Comhpháirteacha um Imscrúdú;
- d. leagtar síos forálacha cosanta sonraí ar leith a bhfuil gá leo chun na socruithe atá ann cheana maidir le cosaint sonraí a fhorlíonadh agus chun foráil a dhéanamh maidir le leibhéal foriomlán leordhóthanach cosanta sonraí, slándáil sonraí agus cosaint chearta bunúsacha na ndaoine lena mbaineann.

Airteagal 2

Raon feidhme

1. Tá feidhm ag an Rialachán seo maidir le próiseáil faisnéise, lena n-áirítear sonraí pearsanta, i gcomhthéacs Foirne Comhpháirteacha um Imscrúdú. Áirítear leis sin sonraí oibríochtúla chomh maith le sonraí neamhoibríochtúla a mhalartú agus a stóráil. Tá feidhm ag an Rialachán seo maidir le céimeanna oibríochtúla agus iar-oibríochtúla na Foirne Comhpháirtí um Imscrúdú, ag tosú ón nóiméad a shíneoidh a chomhaltaí an comhaontú ábhartha maidir le Foireann Chomhpháirteach um Imscrúdú go dtí go dtabharfar meastóireacht JIT chun críche.
2. Ní dhéanann an Rialachán seo leasú ar na forálacha dlí atá ann cheana maidir le Foirne Comhpháirteacha um Imscrúdú a bhunú, a stiúradh nó meastóireacht a dhéanamh orthu, ná ní dhéanann sé difear dóibh ar aon slí eile.

Airteagal 3

Sainmhínithe

Chun críocha an Rialacháin seo, tá feidhm ag na sainmhínithe seo a leanas:

- (1) Ciallaíonn ‘córas faisnéise láraithe’ lárchóras TF ina ndéantar na sonraí a bhaineann le Foirne Comhpháirteacha um Imscrúdú a stóráil agus a phróiseáil;
- (2) Ciallaíonn ‘bogearraí cumarsáide’ bogearraí lena n-éascaítear cianrochtain ar chórais agus malartú comhad agus teachtaireachtaí i bhformáidí téacs, fuaime nó físe idir úsáideoirí ardán comhair na bhFoirne Comhpháirteacha um Imscrúdú;

- (3) Ciallaíonn ‘údaráis inniúla’ údaráis na mBallstát atá inniúil chun a bheith mar chuid d’Fhoireann Chomhpháirteach um Imscrúdú a bunaíodh i gcomhréir le hAirteagal 1 de Chinneadh Réime 2002/465/CGB agus le hAirteagal 13 den Choinbhinsiún um Chúnamh Frithpháirteach in Ábhair Choiriúla idir Ballstáit an Aontais Eorpaigh, arna bhunú ag an gComhairle i gcomhréir le hAirteagal 34 den Chonradh ar an Aontas Eorpach, Oifig an Ionchúisitheora Phoiblí Eorpaigh ag gníomhú di de bhun na n-inniúlachtaí dá bhforáiltear le hAirteagail 22, 23 agus 25 de Rialachán (AE) 2017/1939 ón gComhairle, chomh maith le húdaráis inniúla tríú tíre ar páirtithe iad i gcomhaontú maidir le Foireann Chomhpháirteach um Imscrúdú;
- (4) Ciallaíonn ‘comhaltaí Foireann Chomhpháirteach um Imscrúdú’ ionadaithe na n-údarás inniúil dá dtagraítear i bpointe 3 den Airteagal seo;
- (5) Ciallaíonn ‘úsáideoirí ardán comhair na bhFoirne Comhpháirteach um Imscrúdú’ baill Foireann Chomhpháirteach um Imscrúdú, Eurojust, Europol, OLAF agus comhlachtaí, oifigí agus gníomhaireachtaí inniúla eile de chuid an Aontais;
- (6) Ciallaíonn ‘spás comhair na Foirne Comhpháirtí um Imscrúdú’ spás ar leith le haghaidh gach Foirne Comhpháirtí um Imscrúdú a óstáiltear ar ardán comhair na bhFoirne Comhpháirteacha um Imscrúdú;
- (7) Ciallaíonn ‘riarthóir spáis JIT’ comhalta JIT de chuid Ballstáit, nó comhalta JIT de chuid Oifig an Ionchúisitheora Phoiblí Eorpaigh, arna ainmniú i gcomhaontú JIT, i gceannas ar spás comhair JIT;
- (8) Ciallaíonn ‘sonraí oibríochtúla’ faisnéis agus fianaise a phróiseálann ardán comhair na bhFoirne Comhpháirteacha um Imscrúdú le linn chéim oibríochtúil na Foirne Comhpháirtí um Imscrúdú chun tacú le himscrúduithe agus ionchúisimh trasteorann;
- (9) Ciallaíonn ‘sonraí neamhoibríochtúla’ sonraí riaracháin a phróiseálann ardán comhair na bhFoirne Comhpháirteacha um Imscrúdú, go háirithe chun bainistiú na Foirne Comhpháirtí um Imscrúdú agus comhar laethúil idir úsáideoirí ardán comhair na bhFoirne Comhpháirteacha um Imscrúdú a éascú.

Airteagal 4

Ailtireacht theicniúil ardán comhair na bhFoirne Comhpháirteacha um Imscrúdú

Beidh ardán comhair na bhFoirne Comhpháirteacha um Imscrúdú comhdhéanta den mhéid a leanas:

- (a) córas faisnéise láraithe inar féidir sonraí a stóráil go lárnach ar bhonn sealadach;
- (b) bogearraí cumarsáide lenar féidir sonraí cumarsáide a stóráil go slán ar fheistí úsáideoirí ardán comhair na JITanna;
- (c) nasc idir an córas faisnéise láraithe agus uirlisí TF ábhartha, ag tacú le feidhmiú na bhFoirne Comhpháirteacha um Imscrúdú agus á bhainistiú ag Rúnaíocht Líonra na bhFoirne Comhpháirteacha um Imscrúdú.

Airteagal 5

Cuspóir ardán comhair na bhFoirne Comhpháirteacha um Imscrúdú

1. Is é an cuspóir a bheidh ag ardán comhair na bhFoirne Comhpháirteacha um Imscrúdú an méid seo a éascú:
 - (a) comhordú agus bainistiú laethúil a dhéanamh ar Fhoireann Chomhpháirteach um Imscrúdú, trí shraith feidhmiúlachtaí a thacaíonn leis na próisis riaracháin agus airgeadais laistigh den Fhoireann Chomhpháirteach um Imscrúdú;
 - (b) sonraí oibríochtúla, lena n-áirítear comhaid mhóra, a mhalartú agus iad a stóráil go sealadach trí fheidhmiúlacht uaslódála agus íoslódála;
 - (c) cumarsáid shlán trí fheidhmiúlacht lena gcumhdaítear teachtaireachtaí meandracha, comhráite, closchomhdháil agus físchomhdháil;
 - (d) inrianaitheacht malartuithe fianaise trí shásra logála gnó lenar féidir súil a choinneáil ar an bhfianaise go léir a mhalartaítear trí ardán comhair na bhFoirne Comhpháirteacha um Imscrúdú;
 - (e) measúnú a dhéanamh ar Fhoireann Chomhpháirteach um Imscrúdú trí phróiseas tiomnaithe meastóireachta comhoibríoch.
2. Is é eu-LISA a dhéanfaidh an córas faisnéise láraithe a óstáil ar a shuíomhanna teicniúla.

CAIBIDIL II

Forbairt agus bainistiú oibríochtúil

Airteagal 6

Gníomhartha cur chun feidhme arna nglacadh ag an gCoimisiún

Glacfaidh an Coimisiún na gníomhartha cur chun feidhme is gá chun ardán comhair na bhFoirne Comhpháirteacha um Imscrúdú a chur chun feidhme go teicniúil a luaithe is féidir, agus glacfaidh sé, go háirithe, gníomhartha a bhaineann leis an méid seo a leanas:

- a) liosta de na feidhmiúlachtaí is gá chun comhordú agus bainistiú laethúil a dhéanamh ar Fhoireann Chomhpháirteach um Imscrúdú;
- b) liosta de na feidhmiúlachtaí is gá le haghaidh cumarsáid shlán;
- c) sonraíochtaí gnó an naisc dá dtagraítear in Airteagal 4, pointe (c);
- d) slándáil i gcomhréir le hAirteagal 15;
- e) logaí teicniúla i gcomhréir le hAirteagal 21;
- f) staitisticí teicniúla a sholáthar i gcomhréir le hAirteagal 22;
- g) ceanglais feidhmíochta agus infhaighteachta ardán comhair na bhFoirne Comhpháirteacha um Imscrúdú.

Déanfar na gníomhartha cur chun feidhme dá dtagraítear sa chéad fhomhír den Airteagal seo a ghlacadh i gcomhréir leis an nós imeachta scrúdúcháin dá dtagraítear in Airteagal 25(2).

Freagrachtaí eu-LISA

1. Déanfaidh Gníomhaireacht an Aontais Eorpaigh chun Bainistiú Oibríochtúil a dhéanamh ar Chórais Mhórsála TF sa Limistéar Saoirse, Slándála agus Ceartais ('eu-LISA') dearadh ailtireacht fhisiceach ardán comhair na bhFoirne Comhpháirteacha um Imscrúdú a bhunú lena n-áirítear a shonraíochtaí teicniúla agus an éabhlóid a thiocfaidh ar na sonraíochtaí sin ar bhonn na gcinntí a dhéanfar i gcomhréir le hAirteagal 6. Déanfaidh an Bord Bainistíochta an dearadh sin a fhorfheas, faoi réir tuairim fhabhrach ón gCoimisiún.
2. Beidh eu-LISA freagrach as ardán comhair na bhFoirne Comhpháirteacha um Imscrúdú a fhorbairt i gcomhréir leis an bprionsabal maidir le cosaint sonraí trí dhearadh agus mar réamhshocrú. Is éard a bheidh san fhorbairt mionsaothrú agus cur chun feidhme na sonraíochtaí teicniúla, tástáil agus comhordú foriomlán an tionscadail.
3. Cuirfidh eu-LISA na bogearraí cumarsáide ar fáil d'úsáideoirí ardán comhair na bhFoirne Comhpháirteacha um Imscrúdú.
4. Is é eu-LISA a dhéanfaidh ardán comhair na bhFoirne Comhpháirteacha um Imscrúdú a fhorbairt agus a chur chun feidhme a luaithe is féidir tar éis theacht i bhfeidhm an Rialacháin seo agus tar éis don Choimisiún na gníomhartha cur chun feidhme de bhun Airteagal 6 a ghlacadh.
5. Áiritheoidh eu-LISA go ndéanfar ardán comhair na bhFoirne Comhpháirteacha um Imscrúdú a oibriú i gcomhréir leis an Rialachán seo, leis an ngníomh cur chun feidhme dá dtagraítear in Airteagal 6, agus i gcomhréir le Rialachán (AE) 2018/1725.

6. Is é eu-LISA a bheidh freagrach as bainistiú oibríochtúil ardán comhair na bhFoirne Comhpháirteacha um Imscrúdú. Is éard a bheidh i gceist le bainistiú oibríochtúil ardán comhair na bhFoirne Comhpháirteacha um Imscrúdú na cúraimí go léir is gá chun ardán comhair na bhFoirne Comhpháirteacha um Imscrúdú a choinneáil ag obair i gcomhréir leis an Rialachán seo, agus go háirithe an obair chothabhála agus na forbairtí teicniúla is gá chun a áirithiú go bhfeidhmeoidh ardán comhair na bhFoirne Comhpháirteacha um Imscrúdú ar leibhéal sásúil i gcomhréir leis na sonraíochtaí teicniúla.
7. Áiritheoidh eu-LISA go gcuirfear oiliúint ar fáil maidir le húsáid phraiticiúil ardán comhair na bhFoirne Comhpháirteacha um Imscrúdú.
8. Ní bheidh rochtain ag eu-LISA ar spásanna comhair na Foirne Comhpháirtí um Imscrúdú.
9. Gan dochar d'Airteagal 17 de Rialacháin Foirne Oifigigh an Aontais Eorpaigh, a leagtar síos i Rialachán (CEE, Euratom, CEEG) Uimh. 259/68 ón gComhairle¹², cuirfidh eu-LISA rialacha iomchuí rúndachta gairmiúla nó oibleagáidí comhionanna rúndachta eile i bhfeidhm maidir lena chuid ball foirne ar fad ar gá dóibh bheith ag obair le sonraí atá cláraithe sa chóras faisnéise láraithe. Beidh feidhm ag an oibleagáid sin chomh maith tar éis do na baill foirne sin imeacht as oifig nó scor den fhostaíocht nó tar éis fhoirceannadh a ngníomhaíochtaí.

Airteagal 8

Freagrachtaí na mBallstát

Déanfaidh gach Ballstát na socruithe teicniúla is gá chun go mbeidh rochtain ag a údarais inniúla ar ardán comhair na bhFoirne Comhpháirteacha um Imscrúdú i gcomhréir leis an Rialachán seo.

¹² Rialachán (CEE, Euratom, CEEG) Uimh. 259/68 ón gComhairle an 29 Feabhra 1968 lena leagtar síos Rialacháin Foirne Oifigigh na gComhphobal Eorpach agus Coinníollacha Fostaíochta Sheirbhísigh eile na gComhphobal Eorpach, agus lena dtionscnaítear bearta speisialta is infheidhme ar bhonn sealadach maidir le hoifigigh an Choimisiúin (IO L 56, 4.3.1968, lch. 1).

Airteagal 9

Freagrachtaí na gcomhlachtaí, na n-oifigí agus na ngníomhaireachtaí inniúla de chuid an Aontais

1. Déanfaidh Eurojust, Europol, Oifig an Ionchúisitheora Phoiblí Eorpaigh, OLAF agus comhlachtaí, oifigí agus gníomhaireachtaí inniúla eile de chuid an Aontais na socruithe teicniúla is gá chun go mbeidh rochtain acu ar ardán comhair na bhFoirne Comhpháirteacha um Imscrúdú.
2. Beidh Eurojust freagrach as an oiriúnú teicniúil is gá a dhéanamh ar a chuid córas, oiriúnú is gá chun an nasc dá dtagraítear in Airteagal 4, pointe (c) a bhunú.

Airteagal 10

Bord Bainistíochta an Chláir

1. Roimh chéim deartha agus forbartha ardán comhair na bhFoirne Comhpháirteacha um Imscrúdú, bunóidh Bord Bainistíochta eu-LISA Bord Bainistíochta an Chláir.
2. Beidh deichniúr comhaltaí ar Bhord Bainistíochta an Chláir mar a leanas:
 - a) ochtar comhalta a cheapfaidh an Bord Bainistíochta;
 - b) Cathaoirleach an Ghrúpa Comhairligh dá dtagraítear in Airteagal 11;
 - c) comhalta amháin a cheapfaidh an Coimisiún.
3. Áiritheoidh Bord Bainistíochta eu-LISA go mbeidh, ag na comhaltaí a cheapfaidh sé chuig Bord Bainistíochta an Chláir, an taithí agus an saineolas is gá i bhforbairt agus i mbainistiú chórais TF lena dtugtar tacaíocht d'údaráis bhreithiúnacha.

4. Beidh eu-LISA rannpháirteach in obair Bhord Bainistíochta an Chláir. Chun na críche sin, freastalóidh ionadaithe de chuid eu-LISA ar chruinnithe Bhord Bainistíochta an Chláir chun tuarascáil a chur le chéile i ndáil le dearadh agus le forbairt ardán comhair na bhFoirne Comhpháirteacha um Imscrúdú agus i ndáil le haon obair ghaolmhar eile agus le haon gníomhaíochtaí gaolmhara eile.
5. Tiocfaidh Bord Bainistíochta an Chláir le chéile uair amháin gach trí mhí ar a laghad, agus níos minice ná sin nuair is gá. Áiritheoidh sé go ndéanfar bainistiú iomchuí ar chéim deartha agus forbartha ardán comhair na bhFoirne Comhpháirteacha um Imscrúdú. Cuirfidh Bord Bainistíochta an Chláir tuarascálacha i scríbhinn faoi bhráid Bhord Bainistíochta eu-LISA go rialta, agus gach mí nuair is féidir, maidir le dul chun cinn an tionscadail. Ní bheidh aon chumhacht cinnteoireachta ná aon sainordú ag Bord Bainistíochta an Chláir chun ionadaíocht a dhéanamh thar ceann chomhaltaí Bhord Bainistíochta eu-LISA.
6. Bunóidh Bord Bainistíochta an Chláir a rialacha nós imeachta lena n-áireofar go háirithe rialacha maidir le cathaoirleacht, ionaid le haghaidh cruinnithe, ullmhú cruinnithe, cead isteach a thabhairt do shaineolaithe freastal ar na cruinnithe, pleananna cumarsáide lena n-áiríteofar go gcoimeádfar comhaltaí neamh-rannpháirteacha Bhord Bainistíochta eu-LISA go hiomlán ar an eolas.
7. Beidh cathaoirleacht Bhord Bainistíochta an Chláir ag Ballstát.
8. Déanfaidh eu-LISA rúnaíocht Bhord Bainistíochta an Chláir a áirithiú.

Airteagal 11

Grúpa comhairleach

1. Bunóidh eu-LISA Grúpa Comhairleach chun an saineolas a bhaineann le hardán comhair na bhFoirne Comhpháirteacha um Imscrúdú a fháil, go háirithe agus a chlár oibre bliantúil agus a thuarascáil bhliantúil ar ghníomhaíochtaí á n-ullmhú aige.

2. Le linn chéim deartha agus forbartha ardán comhair na bhFoirne Comhpháirteacha um Imscrúdú, beidh an Grúpa Comhairleach comhdhéanta d'ionadaithe ó na Ballstáit, ón gCoimisiún agus ó Rúnaíocht Líonra na bhFoirne Comhpháirteacha um Imscrúdú. Is é eu-LISA a bheidh ina chathaoirleach air. Déanfaidh sé an méid seo a leanas:
 - a) tiocfaidh sé le chéile go rialta, uair sa mhí ar a laghad, nuair is féidir, go dtí go gcuirfear tús le hoibríochtaí ardán comhair na bhFoirne Comhpháirteacha um Imscrúdú;
 - b) tabharfaidh sé tuairisc do Bhord Bainistíochta an Chláir tar éis gach cruinnithe;
 - c) cuirfidh sé an saineolas teicniúil ar fáil chun tacú le cúraimí Bhord Bainistíochta an Chláir.

CAIBIDIL III

Spásanna comhair d'Fhoirne Comhpháirteacha um Imscrúdú a bhunú mar aon le rochtain ar ardán comhair na JITanna

Airteagal 12a

Spásanna comhair JITanna a bhunú

1. I gcás ina ndéantar foráil i gcomhaontú JIT ardán comhair na JITanna a úsáid i gcomhréir leis an Rialachán seo, cruthófar spás comhair JIT laistigh d'ardán comhair na JITanna le haghaidh gach JIT.
2. Leis an gcomhaontú, cinnfear na rialacha maidir le rochtain a bheith ag údaráis inniúla ar spás comhair ábhartha JIT agus féadfar foráil a dhéanamh ann go dtabharfar rochtain do chomhlachtaí, d'oifigí agus do ghníomhaireachtaí inniúla de chuid an Aontais, agus, i gcás inarb iomchuí, do thríú tíortha a shínigh an comhaontú, ar an spás comhair ábhartha JIT. Déanfar foráil, sa chomhaontú JIT, do na rialacha maidir leis an rochtain sin, i gcomhréir leis an Rialachán seo.

3. Oslóidh riarthóir spáis nó riarthóirí spáis na Foirne Comhpháirtí um Imscrúdú ardán comhair na Foirne Comhpháirtí um Imscrúdú, le tacaíocht theicniúil eu-LISA.
4. Má chinn comhaltaí JIT gan leas a bhaint as ardán comhair na JITanna nuair a shínigh siad an comhaontú JIT ach go dtoilíonn siad tosú ar ardán comhair na JITanna a úsáid fad a mhairfidh JIT, leasófar an comhaontú JIT i gcás nach ndearnadh foráil ann cheana féin don fhéidearthacht sin, agus beidh feidhm ag míreanna 1 go 3 den Airteagal seo. I gcás ina n-aontóidh comhaltaí JIT éirí as ardán comhair na JITanna a úsáid fad a mhairfidh an JIT, leasófar an comhaontú JIT mura raibh an fhéidearthacht sin san áireamh cheana féin sa chomhaontú.

Airteagal 12 b

Ainmniú agus ról riarthóir spáis JIT

1. Má dhéantar foráil sa chomhaontú JIT do leas a bhaint as ardán comhair na JITanna, déanfar riarthóir spáis JIT nó riarthóirí spáis JIT a ainmniú sa chomhaontú JIT, as measc chomhaltaí JIT na mBallstát nó chomhalta JIT de chuid Oifig an Ionchúisitheora Phoiblí Eorpaigh.
2. Déanfaidh an riarthóir spáis nó na riarthóirí spáis JIT cearta rochtana úsáideoirí ardán comhair na JITanna ar spás comhair an JIT a bhainistiú, i gcomhréir leis an gcomhaontú JIT.
3. Féadfar foráil a dhéanamh, leis an gcomhaontú JIT, go mbeidh rochtain ag Rúnaíocht Líonra na JITanna ar spás comhair JIT ar mhaithe le tacaíocht theicniúil agus riaracháin, lena n-áirítear cearta rochtana a bhainistiú. Sna cásanna sin, tabharfaidh riarthóir spáis JIT rochtain ar spás comhair an JIT do Rúnaíocht Líonra na JITanna mar a chomhaontaigh comhaltaí an JIT.

Airteagal 12 c

Rochtain ar spásanna comhair an JIT ag údaráis inniúla na mBallstát agus ag Oifig an Ionchúisitheora Phoiblí Eorpaigh

I gcomhréir leis an gcomhaontú ábhartha JIT, tabharfaidh an riarthóir spáis nó na riarthóirí spáis JIT rochtain ar spás comhair JIT do na húdaráis inniúla a ainmníodh sa chomhaontú JIT sin.

Airteagal 13

Rochtain ar spásanna comhair JIT ag comhlachtaí, oifigí agus gníomhaireachtaí inniúla an Aontais

I gcomhréir leis an gcomhaontú ábhartha JIT, tabharfaidh an riarthóir spáis nó na riarthóirí spáis JIT rochtain, a mhéid is gá, ar spás comhair JIT dóibh seo a leanas:

- a) Eurojust, chun na cúraimí a leagtar amach i Rialachán (AE) 2018/1727 ó Pharlaimint na hEorpa agus ón gComhairle a chomhlíonadh¹³;
- b) Europol, chun na cúraimí a leagtar amach i Rialachán (AE) 2016/794 ó Pharlaimint na hEorpa agus ón gComhairle a chomhlíonadh¹⁴;
- c) OLAF, chun na cúraimí a leagtar amach i Rialachán (AE, Euratom) Uimh. 883/2013 ó Pharlaimint na hEorpa agus ón gComhairle a chomhlíonadh¹⁵ agus

¹³ Rialachán (AE) 2018/1727 ó Pharlaimint na hEorpa agus ón gComhairle an 14 Samhain 2018 maidir le Gníomhaireacht an Aontais Eorpaigh um Chomhar Ceartais Choiriúil (Eurojust) (IO L 295, 21.11.2018, lch. 138).

¹⁴ Rialachán (AE) 2016/794 ó Pharlaimint na hEorpa agus ón gComhairle an 11 Bealtaine 2016 maidir le Gníomhaireacht an Aontais Eorpaigh i ndáil le Comhar i bhForfheidhmiú an Dlí (Europol) (IO L 135, 24.5.2016, lch. 53)

¹⁵ Rialachán (AE, Euratom) Uimh. 883/2013 ó Pharlaimint na hEorpa agus ón gComhairle an 11 Meán Fómhair 2013 maidir le himscrúduithe arna ndéanamh ag an Oifig Eorpach Frith-Chalaoise (OLAF) agus lena n-aisghairtear Rialachán (CE) Uimh. 1073/1999 ó Pharlaimint na hEorpa agus ón gComhairle agus Rialachán (Euratom) Uimh. 1074/1999 ón gComhairle (IO L 248, 18.9.2013, lch. 1).

- d) comhlachtaí, oifigí agus gníomhaireachtaí inniúla eile de chuid an Aontais chun na cúraimí a leagtar amach ina mbunghníomhartha a chomhlíonadh.

Airteagal 14

Rochtain ar spásanna comhair JIT ag údaráis inniúla tríú tíortha

1. I gcomhréir leis an gcomhaontú ábhartha JIT, agus chun na gcríoch a liostaítear in Airteagal 5, tabharfaidh riarthóir spáis nó riarthóirí spáis JIT rochtain ar spás comhair JIT d'údaráis inniúla tríú tíortha a bhfuil an comhaontú JIT sin sínithe acu.
2. Uair ar bith a n-uaslódálann comhaltaí JIT de chuid na mBallstát agus, i gcás ina mbíonn sé rannpháirteach, comhalta JIT de chuid Oifig an Ionchúisitheora Phoiblí Eorpaigh, sonraí oibríochtúla chuig spás comhair JIT le go bhféadfaidh tríú tír iad a íoslódáil, fíoróidh comhalta JIT na mBallstát ábhartha nó comhalta JIT Oifig an Ionchúisitheora Phoiblí Eorpaigh go bhfuil na sonraí atá uaslódáilte acu faoi seach teoranta don mhéid is gá chun críocha an chomhaontaithe ábhartha JIT agus faoi réir na gcoinníollacha a leagtar síos ann.
3. Uair ar bith a n-uaslódálann tríú tír sonraí oibríochtúla chuig spás comhair JIT, fíoróidh riarthóir spáis nó riarthóirí spáis an JIT go bhfuil na sonraí sin teoranta don mhéid is gá chun críocha an chomhaontaithe JIT agus faoi réir na gcoinníollacha a leagtar síos ann, sular féidir le húsáideoirí eile ardán comhair JIT iad a íoslódáil.
4. Áiríteoidh údaráis inniúla na mBallstát nach n-aistreofar a gcuid sonraí pearsanta chuig tríú tíortha dár tugadh rochtain ar spás comhair na Foirne Comhpháirtí um Imscrúdú ach amháin i gcás ina gcomhlíonfar na coinníollacha a leagtar síos i gCaibidil V de Threoir 2016/680.
5. Áiríteoidh Oifig an Ionchúisitheora Phoiblí Eorpaigh, ag gníomhú di i gcomhréir lena hinniúlachtaí mar a fhoráiltear le hAirteagail 22, 23 agus 25 de Rialachán (AE) 2017/1939 ón gComhairle, nach n-aistreofar sonraí pearsanta chuig tríú tíortha ar tugadh rochtain dóibh ar spás comhair JIT ach amháin nuair a bhíonn na coinníollacha a leagtar síos in Airteagail 80-84 de Rialachán (AE) 2017/1939 á gcomhlíonadh.

CAIBIDIL IV

Slándáil agus dliteanas

Airteagal 15

Slándáil

1. Déanfaidh eu-LISA na bearta teicniúla agus eagraíochtúla is gá chun ardleibhéal cibearshlándála ardán comhair na bhFoirne Comhpháirteacha um Imscrúdú agus slándáil faisnéise na sonraí laistigh d'ardán comhair na bhFoirne Comhpháirteacha um Imscrúdú a áirithiú, go háirithe chun rúndacht agus sláine na sonraí oibríochtúla agus neamhoibríochtúla a stóráiltear sa chóras faisnéise láraithe a áirithiú.
2. Cuirfidh eu-LISA cosc ar rochtain neamhúdaraíthe ar ardán comhair na bhFoirne Comhpháirteacha um Imscrúdú agus áiritheoidh sé nach mbeidh rochtain ag na daoine a bheidh údaraíthe chun rochtain a fháil ar ardán comhair na bhFoirne Comhpháirteacha um Imscrúdú ach ar na sonraí a chumhdaítear faoina n-údarú rochtana.
3. Chun críocha mhíreanna 1 agus 2, glacfaidh eu-LISA plean slándála, plean leanúnachais gnó agus plean athshlánaithe ó thubaiste, chun a áirithiú go bhféadfar an córas faisnéise láraithe a aischor i gcás ina dtarlóidh briseadh.
4. Déanfaidh eu-LISA faireachán ar éifeachtacht na mbeart slándála dá dtagraítear san Airteagal seo agus déanfaidh sé na bearta eagrúcháin is gá maidir le féinfhaireachán agus maoirseacht chun a áirithiú go gcomhlíontar an Rialachán seo.

Airteagal 16

Dliteanas

1. I gcás ina ndéanfaidh Ballstát, Eurojust, Europol, Oifig an Ionchúisitheora Phoiblí Eorpaigh, OLAF nó aon chomhlacht, oifig nó gníomhaireacht inniúil eile de chuid an Aontais damáiste d'ardán comhair na bhFoirne Comhpháirteacha um Imscrúdú, toisc nár éirigh leo a gcuid oibleagáidí faoin Rialachán seo a chomhlíonadh, beidh an Ballstát sin, Eurojust, Europol, Oifig an Ionchúisitheora Phoiblí Eorpaigh, OLAF nó comhlacht, oifig nó gníomhaireacht inniúil eile de chuid an Aontais faoi seach, faoi dhliteanas i leith an damáiste sin, ach amháin agus a mhéid nach ndearna eu-LISA bearta réasúnta chun an damáiste sin a sheachaint nó chun a thionchar a íoslaghdú.
2. Éilimh ar chúiteamh a dhéanfar i gcoinne Ballstáit as an damáiste dá dtagraítear i mír 1, is faoi dhlí náisiúnta an Bhallstáit sin a rialálfar iad. Is faoi réir a ngníomhartha bunaidh a rialófar éilimh ar chúiteamh a dhéanfar i gcoinne Eurojust, Europol, Oifig an Ionchúisitheora Phoiblí Eorpaigh, OLAF nó aon chomhlacht, oifig nó gníomhaireacht inniúil eile de chuid an Aontais as an damáiste dá dtagraítear i mír 1.

CAIBIDIL V

Cosaint sonraí

Airteagal 17

Tréimhse choinneála chun sonraí oibríochtúla a stóráil

1. Déanfar sonraí oibríochtúla a bhaineann le gach spás comhair a stóráil sa chóras faisnéise láraithe a fhad is gá chun go gcuirfidh úsáideoirí uile ardán comhair na bhFoirne Comhpháirteacha um Imscrúdú lena mbaineann an próiseas íoslódála i gcrích. Ní bheidh an tréimhse choinneála níos faide ná ceithre seachtaine.
2. A luaithe a bheidh an próiseas íoslódála curtha i gcrích ag gach úsáideoir nó, ar a dhéanaí, ar dhul in éag don tréimhse choinneála dá dtagraítear i mír 1, scriosfar an eilimint sonraí go huathoibríoch ón gcóras láraithe.

Airteagal 18

Tréimhse choinneála chun sonraí neamhoibríochtúla a stóráil

1. I gcás ina mbeidh meastóireacht ar an bhFoireann Chomhpháirteach um Imscrúdú beartaithe, déanfar sonraí neamhoibríochtúla a bhaineann le gach spás comhair a stóráil sa chóras faisnéise láraithe go dtí go mbeidh an mheastóireacht ar an bhFoireann Chomhpháirteach um Imscrúdú curtha i gcrích. Ní bheidh an tréimhse choinneála níos faide ná cúig bliana.
2. Má chinntear gan an mheastóireacht a dhéanamh tráth a gcuirfear an clabhsúr ar an JIT nó, ar a dhéanaí, ar dhul in éag don tréimhse choinneála dá dtagraítear i mír 1, scriosfar an eilimint sonraí go huathoibríoch ón gcóras láraithe.

Airteagal 19

Rialaitheoir sonraí agus próiseálaí sonraí

1. Maidir le gach údarás inniúil náisiúnta i mBallstát, agus i gcás inarb iomchuí, Eurojust, Europol, Oifig an Ionchúisitheora Phoiblí Eorpaigh, OLAF nó aon chomhlacht, oifig nó gníomhaireacht inniúil eile de chuid an Aontais, measfar gur rialaitheoirí sonraí iad i gcomhréir le rialacha cosanta sonraí an Aontais is infheidhme maidir le sonraí pearsanta oibríochtúla a phróiseáil faoin Rialachán seo.
2. Maidir le sonraí a uaslódálann údaráis inniúla tríú tíortha chuig ardán comhair JIT, measfar duine de riarthóirí spáis JIT, a ainmníodh sa chomhaontú ábhartha JIT, a bheith ina rialaitheoir sonraí i ndáil leis na sonraí pearsanta a mhalartaítear agus a stóráiltear in ardán comhair na JITanna.
3. Measfar eu-LISA a bheith ina phróiseálaí sonraí i gcomhréir le Rialachán (AE) 2018/1725 a mhéid a bhaineann leis na sonraí pearsanta a mhalartaítear trí ardán comhair na bhFoirne Comhpháirteacha um Imscrúdú agus a stóráiltear ann.
4. Beidh úsáideoirí ardán comhair na JITanna ina rialaitheoirí comhpháirteacha ar phróiseáil sonraí pearsanta neamhoibríochtúla in ardán comhair na JITanna.

Airteagal 20

An cuspóir atá le próiseáil sonraí pearsanta

1. Na sonraí a iontráiltear in ardán comhair na bhFoirne Comhpháirteacha um Imscrúdú, déanfar iad a phróiseáil chun na gcríoch seo a leanas, agus chun na gcríoch sin amháin:
 - a) sonraí oibríochtúla a mhalartú idir úsáideoirí ardán comhair na JITanna;
 - b) malartú sonraí neamhoibríochtúla idir úsáideoirí ardán comhair na JITanna, chun an JIT agus an comhar laethúil idir úsáideoirí ardán comhair na JITanna a bhainistiú.
2. Beidh rochtain ar ardán comhair na bhFoirne Comhpháirteacha um Imscrúdú teoranta do bhaill foirne chuí-údaráithe na mBallstát inniúil agus údarais tríú tír, Eurojust, Europol, Oifig an Ionchúisitheora Phoiblí Eorpaigh, OLAF agus comhlachtaí, oifigí nó gníomhaireachtaí inniúla eile de chuid an Aontais, a mhéid is gá chun a gcúraimí a chomhlíonadh i gcomhréir leis na cuspóirí dá dtagraítear i mír 1, agus an méid is gá agus is comhréireach leis na cuspóirí atá á saothrú.

Airteagal 21

Logaí teicniúla

1. Áiritheoidh eu-LISA go gcoimeádfar loga ar an rochtain uile ar an gcóras faisnéise láraithe agus ar gach oibríocht próiseála sonraí sa chóras faisnéise láraithe, i gcomhréir le mír 2.
2. Léireoidh na logaí an méid seo a leanas:
 - a) an dáta, an crios ama agus an t-am beacht a bhaineann le rochtain a fháil ar an gcóras faisnéise láraithe;
 - b) marc aitheantais úsáideoir ardán comhair na Foirne Comhpháirtí um Imscrúdú a fuair rochtain ar an gcóras faisnéise láraithe;

- c) dáta, amchrios agus am rochtana na hoibríochta a rinne úsáideoir ardán comhair na Foirne Comhpháirtí um Imscrúdú;
 - d) an oibríocht a rinne úsáideoir ardán comhair na Foirne Comhpháirtí um Imscrúdú.
3. Úsáidfear bearta teicniúla iomchuí chun na logaí a chosaint ar rochtain neamhúdaráithe agus coinneofar iad ar feadh trí bliana nó ar feadh tréimhse is faide ná sin más gá chun nósanna imeachta faireacháin leanúnacha a fhoirceannadh.
 4. Arna iarraidh sin, cuirfidh eu-LISA na logaí ar fáil d'údaráis inniúla na mBallstát gan moill mhíchuí.
 5. Laistigh de theorainneacha a n-inniúlachtaí agus chun a ndualgais a chomhlíonadh, beidh rochtain ag na húdaráis mhaoirseachta náisiúnta atá freagrach as faireachán a dhéanamh ar dhlíthiúlacht na próiseála sonraí ar logaí arna iarraidh sin.
 6. Laistigh de theorainneacha a inniúlachtaí agus chun a dhualgais mhaoirseachta a chomhlíonadh i gcomhréir le Rialachán (AE) 2018/1725, beidh rochtain ag an Maoirseoir Eorpach ar Chosaint Sonraí ar logaí arna iarraidh sin.

CAIBIDIL VI

Forálacha críochnaitheacha

Airteagal 22

Faireachán agus meastóireacht

1. Bunóidh eu-LISA nósanna imeachta chun faireachán a dhéanamh ar fhorbairt ardán comhair na bhFoirne Comhpháirteacha um Imscrúdú maidir leis na cuspóirí a bhaineann le pleanáil agus costais agus chun faireachán a dhéanamh ar fheidhmiú ardán comhair na bhFoirne Comhpháirteacha um Imscrúdú maidir leis na cuspóirí a bhaineann le haschur teicniúil, cost-éifeachtúlacht, slándáil agus cáilíocht seirbhíse.
2. Forálfar leis na nósanna imeachta dá dtagraítear i mír 1 gur féidir staitisticí teicniúla rialta a sholáthar chun críoch faireacháin.
3. I gcás go gcuirfear moill shuntasach ar an bpróiseas forbartha, cuirfidh eu-LISA Parlaimint na hEorpa agus an Chomhairle ar an eolas a luaithe is féidir maidir le cúiseanna na moille sin agus ar an tionchar a bheidh aici i dtéarmaí tráthchlár agus airgeadais.
4. A luaithe a bheidh forbairt ardán comhair na bhFoirne Comhpháirteacha um Imscrúdú tugtha chun críche, cuirfidh eu-LISA tuarascáil faoi bhráid Pharlaimint na hEorpa agus na Comhairle ina míneofar an chaoi ar baineadh amach na cuspóirí, go háirithe i dtaca le pleanáil agus costas, agus ina dtabharfar údar maith le haon chás inar imíodh óna raibh socraithe.
5. I gcás uasghrádú teicniúil ar ardán comhair na bhFoirne Comhpháirteacha um Imscrúdú, uasghrádú a bhféadfadh costais mhóra a bheith mar thoradh air, cuirfidh eu-LISA Parlaimint na hEorpa agus an Chomhairle ar an eolas sula ndéanfar an t-uasghrádú.

6. Dhá bhliain tar éis thús oibríochtaí ardán comhair na bhFoirne Comhpháirteacha um Imscrúdú agus gach bliain ina dhiaidh sin, cuirfidh eu-LISA tuarascáil ar fheidhmiú teicniúil ardán comhair na bhFoirne Comhpháirteacha um Imscrúdú, lena n-áirítear a shlándáil, faoi bhráid an Choimisiúin.
7. Ceithre bliana tar éis thús oibríochtaí ardán comhair na bhFoirne Comhpháirteacha um Imscrúdú agus gach ceithre bliana ina dhiaidh sin, déanfaidh an Coimisiún meastóireacht fhoriomlán ar ardán comhair na bhFoirne Comhpháirteacha um Imscrúdú. Tarchuirfidh an Coimisiún an tuarascáil fhoriomlán mheastóireachta chuig Parlaimint na hEorpa agus chuig an gComhairle.
8. Déanfaidh údaráis inniúla na mBallstát, Eurojust, Europol, Oifig an Ionchúisitheora Phoiblí Eorpaigh, OLAF agus comhlachtaí, oifigí agus gníomhaireachtaí inniúla eile de chuid an Aontais cibé faisnéis is gá a sholáthar do eu-LISA agus don Choimisiún chun na tuarascálacha dá dtagraítear i míreanna 4 agus 7 a dhréachtú. Ní chuirfidh an fhaisnéis sin aon mhodh oibre i gcontúirt ná ní bheidh faisnéis ar áireamh inti ina nochtfar foinsí, ainmneacha comhaltaí foirne ná imscrúduithe.
9. Soláthróidh eu-LISA don Choimisiún an fhaisnéis is gá chun an mheastóireacht fhoriomlán dá dtagraítear i mír 7 a dhéanamh.

Airteagal 23

Costais

Is as buiséad ginearálta an Aontais a sheasfar na costais a thabhfófar i mbunú agus oibriú ardán comhair na bhFoirne Comhpháirteacha um Imscrúdú.

Airteagal 24

Tús oibríochtaí

1. Cinnfidh an Coimisiún an dáta a chuirfear tús le hoibríochtaí ardán comhair na bhFoirne Comhpháirteacha um Imscrúdú, a luaithé a bheidh sé sásta go bhfuil na coinníollacha seo a leanas á gcomhlíonadh:

- a) go mbeidh na gníomhartha cur chun feidhme ábhartha dá dtagraítear in Airteagal 6 glactha;
 - b) go mbeidh tástáil chuimsitheach ar ardán comhair na JITanna déanta ag eu-LISA, i gcomhar leis na Ballstáit, agus úsáid á baint as sonraí tástála anaithnide.
- 2. I gcás ina gcinntídh an Coimisiún an dáta a chuirfear tús leis na hoibríochtaí i gcomhréir le mír 1, cuirfidh sé an dáta sin in iúl do na Ballstáit, Eurojust, Europol, Oifig an Ionchúisitheora Phoiblí Eorpaigh agus OLAF.
 - 3. An cinneadh ón gCoimisiún lena gcinntídh an dáta a chuirfear tús le hoibríochtaí ardán comhair na bhFoirne Comhpháirteacha um Imscrúdú, dá dtagraítear i mír 1, déanfar é a fhoilsiú in Iris Oifigiúil an Aontais Eorpaigh.
 - 4. Tosóidh úsáideoirí ardán comhair na bhFoirne Comhpháirteacha um Imscrúdú ag baint úsáide as ardán comhair na bhFoirne Comhpháirteacha um Imscrúdú ón dáta a chinnfidh an Coimisiún i gcomhréir le mír 1.

Airteagal 25

Nós imeachta coiste

- 1. Tabharfaidh coiste cúnamh don Choimisiún. Beidh an coiste sin ina choiste de réir bhrí Rialachán (AE) Uimh. 182/2011.
- 2. I gcás ina ndéanfar tagairt don Airteagal seo, beidh feidhm ag Airteagal 5 de Rialachán (AE) Uimh. 182/2011.
- 3. I gcás nach dtugann an coiste aon tuairim, ní dhéanfaidh an Coimisiún an dréachtghníomh cur chun feidhme a ghlacadh agus beidh feidhm ag Airteagal 5(4), an tríú fomhír, de Rialachán (AE) Uimh. 182/2011.

Airteagal 26

Leasuithe ar Rialachán (AE) 2018/1726

Leasaítear Rialachán (AE) 2018/1726 mar a leanas:

(1) in Airteagal 1, cuirtear isteach an mhír seo 4a leanas:

‘4a. Beidh an Ghníomhaireacht freagrach as forbairt agus bainistiú oibríochtúil ardán comhair na bhFoirne Comhpháirteacha um Imscrúdú, lena n-áirítear forbairtí teicniúla’;

(2) cuirtear isteach an tAirteagal 8b seo a leanas:

‘Airteagal 8b

Cúraimí a bhaineann le hardán comhair na bhFoirne Comhpháirteacha um Imscrúdú

I ndáil le hardán comhair na bhFoirne Comhpháirteacha um Imscrúdú, déanfaidh an Ghníomhaireacht an méid seo a leanas:

- a) na cúraimí a thugtar dó le Rialachán (AE) Uimh. XXX/20XX ó Pharlaimint na hEorpa agus ón gComhairle¹⁶;
- b) cúraimí a bhaineann le hoiliúint maidir le húsáid theicniúil ardán comhair na bhFoirne Comhpháirteacha um Imscrúdú, lena n-áirítear ábhair oiliúna ar líne a sholáthar.

(3) in Airteagal 14, cuirtear an méid seo a leanas in ionad mhír 1:

Déanfaidh an Ghníomhaireacht faireachán ar na forbairtí i dtaighde is ábhartha do bhainistiú oibríochtúil SIS II, VIS, Eurodac, EES, ETIAS, DubliNet, ECRIS-TCN, e-CODEX , ardán comhair na bhFoirne Comhpháirteacha um Imscrúdú agus córais mhórsála TF eile dá dtagraítear in Airteagal 1(5).’;

(4) in Airteagal 19(1), cuirtear an méid seo a leanas in ionad phointe (ff):

‘(ff) tuarascálacha a ghlacadh ar fheidhmiú teicniúil an mhéid seo a leanas:

¹⁶ Rialachán (AE) Uimh. XXX/20XX ó Pharlaimint na hEorpa agus ón gComhairle lena mbunaítear ardán comhair chun tacú le feidhmiú na bhFoirne Comhpháirteacha um Imscrúdú agus lena leasaítear Rialachán (AE) 2018/1726 (IO L...).’;

- i) SIS de bhun Airteagal 60(7) de Rialachán (AE) 2018/1861 ó Pharlaimint na hEorpa agus ón gComhairle¹⁷ agus Airteagal 74(8) de Rialachán (AE) 2018/1862 ó Pharlaimint na hEorpa agus ón gComhairle¹⁸;
- ii) VIS de bhun Airteagal 50(3) de Rialachán (CE) Uimh. 767/2008 agus Airteagal 17(3) de Chinneadh 2008/633/CGB;
- iii) EES de bhun Airteagal 72(4) de Rialachán (AE) 2017/2226;
- iv) ETIAS de bhun Airteagal 92(4) de Rialachán (AE) 2018/1240;
- v) ECRIS-TCN agus bogearraí tagartha do chur chun feidhme ECRIS de bhun Airteagal 36(8) de Rialachán (AE) 2019/816 ó Pharlaimint na hEorpa agus ón gComhairle¹⁹;
- vi) na comhpháirteanna idir-inoibritheachta de bhun Airteagal 78(3) de Rialachán (AE) 2019/817 agus Airteagal 74(3) de Rialachán (AE) 2019/818;
- vii) an córas e-CODEX de bhun Airteagal 14(1) de Rialachán (AE) XXX18;
- viii) ardán comhair na bhFoirne Comhpháirteacha um Imscrúdú de bhun Airteagal xx de Rialachán (AE) XXX19 [an Rialachán seo];

¹⁷ Rialachán (AE) 2018/1861 ó Pharlaimint na hEorpa agus ón gComhairle an 28 Samhain 2018 maidir le Córas Faisnéise Schengen a bhunú, a oibriú agus a úsáid i réimse na seiceálacha teorann, lena leasaítear an Coinbhinsiún lena gcuirtear Comhaontú Schengen chun feidhme, agus lena leasaítear agus lena n-aisghairtear Rialachán (CE) Uimh. 1987/2006 (IO L 312, 7.12.2018, lch. 14).

¹⁸ Rialachán (AE) 2018/1862 ó Pharlaimint na hEorpa agus ón gComhairle an 28 Samhain 2018 maidir le Córas Faisnéise Schengen (SIS) a bhunú, a oibriú agus a úsáid i réimse an chomhair póilíneachta agus an chomhair bhreithiúnaigh in ábhair choiriúla, lena leasaítear agus lena n-aisghairtear Cinneadh 2007/533/CGB ón gComhairle agus lena n-aisghairtear Rialachán (CE) Uimh. 1986/2006 ó Pharlaimint na hEorpa agus ón gComhairle agus Cinneadh 2010/261/AE ón gCoimisiún (IO L 312, 7.12.2018, lch. 56).

¹⁹ Rialachán (AE) 2019/816 ó Pharlaimint na hEorpa agus ón gComhairle an 17 Aibreán 2019 lena mbunaítear córas láraithe leis na Ballstáit a shainaithint ag a bhfuil faisnéis faoi chiontuithe náisiúnach tríú tír agus daoine gan stát (ECRIS-TCN) chun an Córas Faisnéise Eorpach um Thairfidh Choiriúla a fhorlíonadh agus lena leasaítear Rialachán (AE) 2018/1726 (IO L 135, 22.5.2019, lch. 1).

(5) in Airteagal 27(1), cuirtear isteach pointe (dc) mar a leanas:

‘(dc) Grúpa Comhairleach ardán comhair na bhFoirne Comhpháirteacha um Imscrúdú;’.

Airteagal 27

Teacht i bhfeidhm

Tiocfaidh an Rialachán seo i bhfeidhm an fichiú lá tar éis lá a fhoilsithe in Iris Oifigiúil an Aontais Eorpaigh.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát i gcomhréir leis na Conarthaí.

Arna dhéanamh sa Bhruiséil,

Thar ceann Pharlaimint na hEorpa

Thar ceann na Comhairle

An tUachtarán

An tUachtarán
